

## REGLUGERÐ

### fyrir Iðnaðarbanka Íslands hf.

#### I. KAFLI

##### Stofnun og skipulag bankans.

###### 1. gr.

Iðnaðarbanki Íslands hf. er stofnaður samkvæmt heimild í lögum nr. 113 frá 29. desember 1951.

Bankinn er hlutafélag og er hlutafé hans að minnsta kosti 45 millj. kr., en heimilt er lögumtætt hluthafafundi að auka hlutaféð sbr. lög nr. 31 frá 27. apríl 1963.

Með yfirstjórn bankans fer fundur hluthafa, svo sem segir í samþykktum félagsins, bankaráð sem kosið er á aðalfundi bankans og bankastjórn, sem bankaráð ræður.

#### II. KAFLI

##### Starfsemi bankans.

###### 2. gr.

Iðnaðarbankinn hefur sparisjóðsréttindi og nýtur í hvívetna sömu réttinda sem Landsbanka Íslands eru veitt í 18., 19. og 21.—23. gr. laga nr. 11 1961.

###### 3. gr.

Hlutverk Iðnaðarbankans er að reka hvers konar bankastarfsemi, er sérstaklega miði að því að styðja verksmiðjuíðnað og handiðnað í landinu. Þetta hlutverk sitt leysir bankinn af hendi með því:

- a. Að taka við spariinnlánnum og veltiinnlánnum til ávöxtunar og varðveislu.
- b. Að kaupa og selja víxla, tékka og aðrar ávisanir.
- c. Að kaupa og selja verðbréf.
- d. Að veita hvers konar lán önnur gegn tryggingum, sem bankinn metur gildar.
- e. Að kaupa og selja erlendan gjaldeyri og reka hvers kyns erlend bankaviðskipti, sbr. þó ákvæði 29. gr.
- f. Að hafa með höndum umsjón og varðveislu eigna.
- g. Að geyma verðmæti gegn gjaldi.
- h. Að annast önnur venjuleg viðskiptabankastörf.

#### A. Innlán.

##### 1. Spariinnlán.

###### 4. gr.

Bankinn tekur við spariinnlánnum til ávöxtunar, mianst kr. 100.00 í senn. Bankinn er eigi skyldur til að taka á móti mjög stórum upphæðum til ávöxtunar, ef bankastjórn telur það óhagkvæmt.

###### 5. gr.

Þegar stofnað er til spariinnlánsviðskipta, er viðskiptamanni fengin sérstök sparisjóðsbók, sem í eru færðar allar færslur á viðkomandi innlánsreikningi. Þegar ný sparisjóðsbók er afhent, greiðir viðskiptamaður fyrir hana gjald skv. ákvörðun bankastjórnar.

Sá, sem leggur inn eða tekur út fé af spariinnlánsreikningi, skal afhenda útfyllt eyðublað skv. nánari ákvörðun bankastjórnar. Sparisjóðsbækur skulu að jafnaði

bera nafn eiganda þeirra, en heimilt er einnig að auðkenna þær eða þær séu nafnlausar án auðkenna. Vanti einhverjar þær upplýsingar, sem eyðublaðið krefst, getur bankinn neitað um afgreiðslu.

Þegar fé er lagt inn eða tekið út af spariinnlánsreikningi, skal það fært í sparisjóðsbókina. Heimilt er þó að taka við innborgun gegn kvittun, án þess að sparisjóðsbók sé sýnd, enda fellur slík kvittun úr gildi, þegar innborgun hefur verið færð í bókina, næst þegar bókin er sýnd í bankanum.

Eigendur spariinnlánsreikninga geta mælt svo fyrir, að aðrir en þeir sjálfir megi ekki leggja inn eða taka út fé af reikningum þeirra, enda afhendi þeir bankanum rithandarsýnishorn sitt um leið. Að öðrum kosti ber bankinn eigi ábyrgð á heimildarlausri úttekt eða innborgun.

#### 6. gr.

Vextir af spariinnlánnum reiknast í heilum krónum af hverju innleggi frá og með næsta degi eftir að féð er lagt inn. Við úttekt reiknast vextir frá og með úttektardegi.

31. desember ár hvert skulu samanlagðir vextir leggjast við höfuðstólinn. Vexti skal færa í sparisjóðsbækur, þegar þær í fyrsta sinn eru sýndar í bankanum eftir að þeir voru lagðir við innstæður.

#### 7. gr.

Spariinnlánnum má skipta í flokka eftir því, hvort krafist sé uppsagnarfrests á innstæðum eða ekki. Af fé, sem stendur inni á almennum spariinnlánsreikningi, verður greitt það, er menn óska, án uppsagnarfrests. Þó er bankastjórn heimilt að áskilja, að upphæðum frá kr. 500 þús. til kr. 1 millj. sé sagt upp með viku fyrirvara og upphæðum þar yfir með eins mánaðar fyrirvara. Án eins mánaðar uppsagnarfrests er bankinn eigi skyldur að greiða meira en kr. 1 millj. á mánuði hverjum úr sömu sparisjóðsbók.

Um þær tegundir spariinnlána, þar sem uppsagnarfrests er krafist, fer eftir reglum sem settar eru af bankastjórn. Heimilt er að greiða hærri vexti af bundnum innstæðum, en af fé með venjulegum sparisjóðskjörum.

#### 8. gr.

Bankastjórn er heimilt að segja lausu fé á spariinnlánsreikningum með þriggja mánaða fyrirvara, annað hvort með áritun í bókina eða auglýsingu í Lögbirtingablaði. Eftir að sá fyrirvari er liðinn, greiðast engir vextir af því fé, sem sagt er upp.

#### 9. gr.

Glatist sparisjóðsbók ber eiganda að snúa sér til bankans, er annast um að handhafa hennar verði stefnt, skv. 19. gr. laga nr. 11 1961, sbr. 10. gr. laga um Iðnaðarbanka Íslands h. f. Kostnaðinn greiðir eigandinn.

#### 10. gr.

Ef eigandi að innstæðufé hvorki leggur inn né tekur út í 19½ ár samfleytt, verður hætt að greiða vexti af því og er þá heimilt með auglýsingu, er skal birt með misseris fyrirvara á þann hátt sem segir í 9. gr., að skora á eiganda að vitja fjárins. Gefi hann sig eigi fram, áður en fresturinn er liðinn, er viðskiptabók hans ógild, en féð ásamt vöxtum rennur til bankans sbr. 2. gr. laga nr. 14 1905.

### 2. Veltiinnlán.

#### 11. gr.

Bankinn tekur við fé til ávöxtunar á veltiinnlánnum (ávísanareikningar og hlaupareikningar), sem stofnaðir eru með að minnsta kosti kr. 20 þús. innborgun. Við-

skiptamaður, sem óskar að opna veltiinnlánsreikning skal leggja fram skriflega umsókn, þar sem tilgreint er nafnnúmer umsækjanda, fæðingardagur og ár, atvinna og heimilisfang. Sé umsækjandi ekki þekktur í bankanum, skulu fylgja meðmæli tveggja manna, sem bankinn viðurkennir. Að jafnaði skulu veltiinnlánsreikningar ekki opnaðir fyrr en að vel athuguðu máli.

Sá sem leggur inn fé á veltiinnlánsreikning, skal afhenda útfyllt eyðublað, skv. nánari ákvörðun bankastjórnar. Bankinn greiðir út fé af veltiinnlánsreikningum gegn tékkum, sem ritaðir eru á sérstök eyðublöð bankans og útgefin af eiganda reiknings eða þeim, sem hann hefur gefið umboð. Sá, sem heimild hefur til útgáfu tékka á reikning, skal afhenda bankanum rithandarsýnishorn sitt. Þegar viðskiptamaður fær tékkhefti, skal hann greiða fyrir það gjald, skv. ákvörðun bankastjórnar.

Bankinn getur neitað að greiða tékka, sem eigi eru rétt útfylltir skv. formi sínu. Greiði bankinn falsaða tékka eða tékka, sem gefinn hefur verið út í heimildarleysi og tékkinn útgefinn á eyðublað úr tékkhefti, sem reikningseigandi hefur sjálfur fengið, skal hann bera skaðann, nema augljósu gáleysi starfsmanna bankans sé að kenna.

#### 12. gr.

Enginn má gefa út tékka á meira fé en hann á innstæðu fyrir, nema sérstaklega sé um samið við bankastjórn sbr. 18. og 22. gr. Sé um misnotkun tékkareikninga að ræða, skal fara með það mál eftir reglum, sem bankastjórn setur. Bankanum er jafnframt heimilt að eiga aðild að samkomulagi banka og sparisjóða um tékkaviðskipti. Sé um ítrekað eða alvarlegt tékkamisferli að ræða, er bankanum heimilt að loka viðkomandi reikningum tafarlaust og innkalla um leið óútgefin tékkaeyðublöð sem reikningseigendur kunna að hafa undir höndum.

#### 13. gr.

Bankinn sendir eigendum veltiinnlánsreikninga útskriftir af reikningum þeirra, þar sem sýndar eru allar færslur á viðkomandi reikningi. Þessar útskriftir skulu sendar eigendum eins oft og bankastjórn telur fært en þó eigi sjaldnar en einu sinni á ári.

#### 14. gr.

Þrátt fyrir ákvæði 11. gr. er bankanum heimilt að greiða út fé af veltiinnlánsreikningi skv. skriflegum fyrirmælum reikningseiganda eða símskeyti hans, staðfest á venjulegan hátt, enda gangi greiðslan inn á annan reikning við bankann eða til annars banka eða sparisjóðs. Þá er bankanum heimilt að ráðstafa fé af veltiinnlánsreikningum til greiðslu gjaldfallinna skulda reikningseiganda við bankann. Allar slíkar skuldfærslur skulu tilkynntar reikningseiganda tafarlaust.

#### 15. gr.

Í tékkaávisun sem gefin er út á innstæðu á veltiinnlánsreikningi, verður upphæðin að vera tilgreind með tölustöfum og bókstöfum. Sé þess ekki gætt, þá er bankinn eigi skyldur til að greiða ávisanaupphæðina. Sé fjárhæðin tilgreind öðruvísi með tölustöfum en bókstöfum, þá gildir sú upphæð, sem með bókstöfum er skráð.

#### 16. gr.

Um fyrningar innstæðu á veltiinnlánsreikningum gilda ákvæði 10. gr.

### 3. Önnur innlán.

#### 17. gr.

Bankanum er heimilt að taka til ávöxtunar fé með öðrum hætti en að framan greinir, svo sem gegn viðtökuskrifteini, og skulu þá um slík viðskipti gilda sérstakar reglur, sem bankastjórn setur.

**B. Útlán.****18. gr.**

Útlánastarfsemi bankans skal hagað svo, að sem best samrýmist því hlutverki hans, að styðja verksmiðjuíðnað og handiðnað í landinu.

**19. gr.**

Bankinn leysir útlánastarfsemi sína af hendi með:

1. Kaupum á víxlum.
2. Yfirdráttarlánnum á hlaupareikningum.
3. Kaupum á skuldabréfum og öðrum verðbréfum.
4. Framleiðslulánnum.
5. Samkeppnislánnum.
6. Fasteignaveðslánnum veðdeildar.
7. Öðrum lánnum, sem samrýmast háttum viðskiptabanka.

**20. gr.**

Synjun bankans á lánsbeiðnum þarf ekki að vera skrifleg, og ekki verður bankinn krafinn um ástæðu til synjunar.

**21. gr.**

Bankastjórn skal að jafnaði krefjast þess að settar séu tryggingar fyrir útlánnum bankans, svo sem fasteignaveð, sjálfsvörsluveð í lausafé, handveð, ábyrgð eða aðrar tryggingar, sem bankastjórn telur fullnægjandi.

**22. gr.**

Um yfirdráttarlán skal að jafnaði gerður sérstakur lánsamningur. Skal í honum greint hámark lánsins og gjalddaga. Um útborgun yfirdráttarlána gilda reglur 11., 12. og 14. gr. reglugerðar þessarar.

**23. gr.**

Um framleiðslulán og samkeppnislán gilda reglur, sem settar eru af bankastjórn í samræmi við reglur um framleiðslulán, sem Seðlabankinn ákveður, og ákvarðanir Útflutningslána sjóðs um samkeppnislán.

**24. gr.**

Bankanum er heimilt að kaupa og selja verðbréf ríkisins, bæjar- og sveitarfélaga og önnur trygg verðbréf.

**25. gr.**

Um fasteignaveðslán veðdeildar bankans gilda ákvæði 3. kafla þessarar reglugerðar.

**26. gr.**

Bankanum er heimilt að veita lán með öðrum hætti, en að framan greinir, enda sé þess gætt að slík lán samrýmist eðlilegri bankastarfsemi.

**C. Ábyrgðir.****27. gr.**

Bankanum er heimilt að ábyrgjast greiðslur til innlendra eða erlendra aðila fyrir viðskiptamenn sína, gegn skilyrðum þeim, sem bankastjórn ákveður hverju sinni. Ábyrgð er einföld, nema annað sé tekið fram. Sá sem óskar ábyrgðar bankans, skal sækja um hana skriflega.

**D. Innheimtur.****28. gr.**

Bankinn annast innheimtur fyrir innlenda og erlenda kröfuhafa hérlendis og erlendis.

**E. Gjaldeyrisverslun.****29. gr.**

Bankanum er heimilt að annast kaup og sölu á erlendum gjaldeyri skv. gildandi lögum og reglum um gjaldeyrisverslun. Ákvæði þessarar greinar öðlast ekki gildi fyrir en bankinn fær leyfi til gjaldeyrisverslunar.

**F. Önnur starfsemi.****30. gr.**

Bankinn hefur með höndum umsjón og varðveislu eigna, skv. nánari ákvörðun bankastjórnar og bankaráðs.

**31. gr.**

Bankinn annast öll önnur venjuleg viðskiptabankastörf.

**III. KAFLI****Veðdeild.****32. gr.**

Veðdeild Iðnaðarbanka Íslands h. f. starfar sem fjárhagslega sjálfstæð deild undir sömu stjórn og Iðnaðarbankinn. Eignum og skuldum veðdeildarinnar svo og reikningshaldi öllu skal haldið aðskildu frá öðrum deildum bankans. Endurskoðendur bankans annast endurskoðun veðdeildarinnar.

**33. gr.**

Úr veðdeildinni er heimilt að veita lán með veði í fasteign og má lánstími vera allt að 10 árum. Bankastjórn ákveður fjárhæð veittra lána. Hvert einstakt lán má ekki vera hærra en 50% af virðingarverði fasteignar þeirrar, sem trygging er tekin í, að viðbættum áhvílandi veðböndum.

**34. gr.**

Til fjáröflunar fyrir veðdeildina er Iðnaðarbankanum heimilt að gefa út bankavaxtabréf, sem hljóða á handhafa. Ráðherra ákveður fjárhæð bréfanna og aðra skilmála að fengnum tillögum bankaráðs og bankastjórnar.

**35. gr.**

Að öðru leyti gilda um veðdeildina sömu ákvæði reglugerðar þessarar og um aðrar deildir og starfsemi bankans.

**36. gr.**

Iðnaðarbankinn ber fulla ábyrgð á öllum skuldbindingum veðdeildarinnar.

**IV. KAFLI****Stjórn bankans.****37. gr.**

Með yfirstjórn bankans fer fundur hluthafa, bankaráð og bankastjórn svo sem segir í samþykktum bankans. Bankaráð hefur æðstu forstöðu bankans utan hluthafafunda og ræður það bankastjóra.

## 38. gr.

Bankastjórn Iðnaðarbankans er skipuð bankastjórum hans og hefur hún með höndum daglega stjórn starfsemi bankans í samræmi við lög um bankann, samþykktir bankans, reglugerð þessa og ákvörðun bankaráðs.

## 39. gr.

Bankastjórnin ráðstafar fé bankans og ber henni að sjá um, að bankareksturinn sé í öllum greinum samkvæmt lögum bankans, samþykktum hans og reglugerð þessari. Bankastjórnin ræður starfsmenn bankans, aðra en þá, sem bankaráðinu er falið sérstaklega að ráða, og segir þeim upp. Hún segir þeim fyrir um skyldur þær, er á þeim hvíla, og um störf þau, sem þeir eiga að annast, og hefur eftirlit með, að það sé framkvæmt, sem þeim er lagt á herðar.

## 40. gr.

Bankastjórn skal undirrita, svo að skuldbindi bankann, ef gefa skal út eða fram-selja víxla, önnur verðbréf eða skriflegar skuldbindingar. Undirskrift bankastjórnar og eigi annarra þarf til þess, svo að gilt sé, að leigja eignir eða taka á leigu, undir-rita skuldbréf eða gera aðrar meiri háttar ráðstafanir í nafni bankans.

Bankaráð getur veitt tilteknum öðrum starfsmönnum bankans umboð til að skuldbinda bankann skv. 1. málsgrein með undirskrift sinni ásamt einum banka-stjóra. Bankaráð getur enn fremur veitt tilteknum starfsmönnum umboð til að skuldbinda bankann ásamt starfsmönnum þeim, er umboð hafa samkvæmt framangreindu, er gefa skal út innlenda og erlenda tékka, ábyrgðarskuldbindingar, framselja víxla til innheimtu og undirrita sparisjóðsbækur.

## 41. gr.

Bankastjórn skal gæta þess, að bankinn eigi ávallt hæfilegan hlut eigna sinna í auðseldum verðbréfum, víxlum og lánum, sem greiðast eiga á skömmum tíma. Skal eign bankans í ríkistryggðum verðbréfum, öðrum auðseldum verðbréfum og inn-stæðum í öðrum bönkum vera að minnsta kosti 15% af innstæðum á spariinnlánum sbr. 9. gr. laga um bankann nr. 13/1951 og nr. 31/1963.

## 42. gr.

Við ákvörðun um heildar fyrirgreiðslu til eins viðskiptaaðila í formi útlána og/eða ábyrgða skal bankastjórn gæta þess, að heildarfjárhæðin sé í hæfilegu hlut-falli við eigið fé bankans með hliðsjón af þeim tryggingum, sem settar hafa verið, og fjárhag viðskiptaaðilans.

## 43. gr.

Iðnaðarbankanum er heimilt að eiga hlutabréf eða eignarhluta í öðrum fyrir-tækjum eða stofnunum, sem reka bankastarfsemi eða aðra starfsemi, sem skyld er bankastarfsemi eða í eðlilegum tengslum við hana. Slík eignaraðild skal ákveðin af bankaráði að fengnum tillögum bankastjórnar. Umfram það sem hér er heimilað, má Iðnaðarbankinn ekki á neinn hátt bera ábyrgð sem þátttakandi eða meðeigandi í rekstri annarra fyrirtækja eða stofnana, samanber þó 44. gr.

## 44. gr.

Bankanum er heimilt án takmarkana að yfirtaka eignir til að tryggja fullnustu kröfu. Eignirnar skulu seldar strax og það er talið hagkvæmt að mati bankaráðs að fengnum tillögum bankastjórnar.

## 45. gr.

Bankastjórum er rétt og skylt að sitja fundi bankaráðs og taka þátt í umræðum, nema rétt sé um mál, er snerta þá sjálfa. Að minnsta kosti einu sinni í mánuði skal

bankastjórn á fundi bankaráðs leggja fram skýrslu um innlán og útlán bankans og um annað það, sem bankaráðinu þykir nauðsynlegt, til þess að geta haft eftirlit með starfsemi bankans.

#### 46. gr.

Útibú bankans annast þau bankastörf, sem bankaráð og bankastjórn ákveða, og samkvæmt ákvæðum reglugerðar þessarar. Útibússtjórnar hafa á hendi stjórn daglegrar starfsemi útibúanna samkvæmt fyrirætlun bankastjórnar og í umboði hennar. Bankastjórn getur með samþykki bankaráðs veitt tilteknum starfsmönnum útibús umboð til að skuldbinda útibúin ásamt útibússtjóra.

### V. KAFLI

#### Bókhald, reikningsskil og endurskoðun.

#### 47. gr.

Reikningsár Iðnaðarbankans er almanaksárið. Fyrir hvert reikningsár skulu gerð reikningsskil, en þau fela í sér rekstrarreikning og efnahagsreikning ásamt athugasemdum endurskoðenda. Ársreikninga skal birta í Stjórnartíðindum.

#### 48. gr.

Aðalbókari bankans hefur yfirumsjón með öllu bókhaldi aðalbankans og útibúa. Bókhaldið og þar með talin öll fylgiskjöl og önnur færslugögn skulu vera í skipulegu og öruggu kerfi. Allt innra eftirlit í bókhaldskerfinu skal vera sem öruggast. Bókhald bankans skal gert upp og afstemmt daglega en sérstakt reikningsyfirlit skal gert um hver mánaðamót. Allar breytingar eða leiðréttingar í bókhaldi bankans skulu þannig gerðar að glöggst sjáist, hvað þar hefur staðið upphaflega. Um gerð bókhaldsins fer að öðru leyti eftir ákvæðum laga um bókhald. Bankaráð setur aðalbókara sérstakt erindisbréf þar sem nánar er kveðið á um starfssvið hans og verkefni.

#### 49. gr.

Aðalfundur Iðnaðarbankans kys hlutfallskosningu tvo bókhaldsfróða endurskoðendur til eins árs í senn. Þeir skulu endurskoða reikninga bankans svo að þeir séu þess fullvissir, að bókhaldið sýni rétta mynd af því, sem fram hefur farið. Endurskoðendur hafa aðgang að öllum eignum, bókum, fylgiskjölum og öðrum gögnum bankans og jafnframt skal bankaráð og starfsmenn bankans veita þeim allar umbeðnar upplýsingar, sem unnt er að láta í té. Telji endurskoðendur nauðsynlegt, hafa þeir heimild til með samþykki bankaráðs, að fá til ráðuneytis löggiltan endurskoðanda.

Endurskoðendur skulu að minnsta kosti ársfjórðungslega gera fyrirvaralausá sjóðstalningu hjá aðalbanka og útibúum. Þeir skulu einnig að minnsta kosti tvisvar á ári gera skyndikannanir og úrtaksatnuganir á öðrum eignum og skuldum bankans.

#### 50. gr.

Endurskoðendur skulu fullvissa sig um að bókhaldskerfi bankans og allt innra eftirlit þess sé í fullnægjandi horfi.

#### 51. gr.

Verði endurskoðendur þess varir, að vanræksla eigi sér stað í einhverju eða að nauðsynlegar endurbætur þurfi að gera, þá eiga þeir að benda bankastjórn og bankaráði á það og gera tillögu um endurbætur.

## 52. gr.

Fyrir lok marsmánaðar ár hvert skulu endurskoðendur hafa lokið endurskoðun á ársreikningi bankans og þer þeim þá þegar að afhenda hann bankaráði og bankastjórn, ásamt athugasemdum sínum. Í síðasta lagi tveimur vikum fyrir aðalfund skal bankastjórn hafa samið svör sín við athugasemdum endurskoðenda og skulu þau liggja hluthöfum til sýnis ásamt ársreikningi.

## 53. gr.

Endurskoðendur skulu gefa bankaráði árlega skýrslu um störf sín svo og endrænar, þegar þeim þykir ástæða til.

## 54. gr.

Bankaráð setur endurskoðendum erindisbréf, þar sem nánar er kveðið á um skyldur þeirra og verkefni.

## 55. gr.

Laun endurskoðenda skulu ákveðin af aðalfundi Iðnaðarbankans.

## 56. gr.

Bankanum er heimilt að taka þátt í Reiknistofu bankanna og að bókhald bankans verði fært þar. Þá er bankaráðinu heimilt að setja reglur, að fengnum tillögum bankastjóra, um geymslu og eyðingu skjala.

## VI. KAFLI

## Starfsmenn bankans.

## 57. gr.

Ekki verða gefnar upplýsingar um viðskipti manna við bankann, skuldir þeirra né eignir. Bankaráðsmenn, bankastjórar og aðrir starfsmenn bankans eru bundnir þagnarskyldu um allt það, er snertir hagi viðskiptamanna bankans og þeir fá vitneskju um í starfi sínu. Þagnarskyldan helst, þótt láti þeir af starfi.

Allir starfsmenn bankans skulu undirrita drengskaparheit um það, að þeir með árvekni og samvirkusemi skulu gegna störfum þeim sem þeim eru falin, og ekki gera neinum óviðkomandi kunnugt um málefni bankans né viðskipti einstakra aðila við hann.

## 58. gr.

Starfsmenn bankans mega ekki, án leyfis bankastjórnar, taka að sér annað launað starf eða reka atvinnu.

## 59. gr.

Starfsmenn bankans eru skyldugir til að vinna fram yfir venjulegan starfstíma bankans, þegar þess er þörf.

## 60. gr.

Starfsmönnum bankans er bannað að gerast umboðsmenn annarra gagnvart bankanum.

## VII. KAFLI

## Ýmis ákvæði.

## 61. gr.

Aðalgjaldkeri bankans hefur umsjón með öllu lausu fé aðalbankans og útibúa. Fyllsta öryggis skal gætt við geymslu seðla og myntar svo og við alla gjaldkeraafgreiðslu. Bankaráð setur aðalgjaldkera erindisbréf þar sem nánar er kveðið á um skyldur hans og verkefni.

## 62. gr.

Svo fljótt sem verða má skulu allar kvittanir frá bankanum vera vélstimplaðar og undirritaðar af gjaldkera. Slíkar kvittanir eru fullgild staðfesting á greiðslum.

## VIII. KAFLI

## Iðnlánasjóður.

## 63. gr.

Samkvæmt sérstökum samningi annast Iðnaðarbankinn umsjá og rekstur Iðnlánasjóðs. Um Iðnlánasjóð fer að öðru leyti eftir sérstökum lögum, sem um hann gilda, og reglugerðum og fyrirmælum sem sett kunna að vera af ráðherra eða stjórn sjóðsins.

## 64. gr.

Breytingar á reglugerð þessari má einungis gera á aðalfundi Iðnaðarbankans, enda staðfesti ráðherra þær.

Þannig samþykkt á aðalfundi Iðnaðarbanka Íslands h. f., hinn 5. apríl 1975.

Í bankaráði Iðnaðarbanka Íslands h. f.

**Gunnar J. Friðriksson.**      **Sigurður Kristinsson.**      **Magnús Helgason.**

**Páll Sigurðsson.**      **Haukur Eggertsson.**

Framanrituð reglugerð staðfestist sem reglugerð fyrir Iðnaðarbanka Íslands h. f. Jafnframt fellur úr gildi reglugerð fyrir Iðnaðarbanka Íslands h. f., nr. 185 9. nóv. 1962 sbr. breyting á seinni reglugerð frá 17. apríl 1970 nr. 73/1970.

*Iðnaðarráðuneytið, 22. september 1975.*

**Gunnar Thoroddsen.**

Árni P. Arnason.

23. september 1975.

Nr. 436.

## AUGLÝSING

**um breytingu á gjaldskrá fyrir Hitaveitu Seltjarnarness nr. 313 11. október 1974.**

a-liður 4. gr. orðist þannig:

fastagjald, kr. 300.00 á mánuði fyrir hvern aðalhemil.

b-liður 4. gr. orðist þannig:

Vatnsgjald, kr. 1 060.00 á mánuði fyrir hvern mínútulítra í hámarksstillingu hemils.

Gjaldskrárbreyting þessi, sem ákveðin er samkvæmt Orkulögum nr. 58 29. apríl 1967, staðfestist hér með til að taka gildi nú þegar, og birtist til eftirbreytni öllum, sem hlut eiga að máli.

*Iðnaðarráðuneytið, 23. september 1975.*

F. h. r.

**Árni P. Arnason.**

Jóhannes Guðfinnsson.